

醫學輯要卷二

第 甘盤幼盟同校

安義 黃柱臣先生鑑定 南坡後學謝甘澍謹輯

門人 李丙寅質臣類纂

門人 李賡華心亭編次

傷寒門類 傷寒綱領

凡看傷寒以傳經直中四字爲綱領傳經者由太陽

傳陽明由陽明傳少陽由少陽傳太陰由太陰傳少
陰由少陰傳厥陰此名循經傳也亦有越經傳者如
寒邪初客太陽有不傳陽明而徑傳少陽者有不傳
陽明經而徑傳陽明府者亦有由陽明不傳少陽而
徑入本府者亦有少陽不傳三陰而徑入胃府者亦
有傳一二經而止者亦有始終只在一經者雖所傳
各各不同其爲傳經則一也若夫直中者謂不由陽

經傳入而經中三陰者也中太陰則病淺中少陰則
病深中厥陰則愈深矣此其所當急溫也夫傳經之
邪在表爲寒入裏卽爲熱症不比直中之邪則但寒
而無熱也先明傳經直中庶寒熱之劑不至混投矣
仲景三陰條下混同立言而昧者不察無怪其意亂
心迷也乎

傷寒傷風辨

傷寒鬱而後能發熱傷風卽能發熱傷寒無汗傷風
有汗傷寒無涕傷風有涕傷寒手足微厥傷風手
足背皆溫傷寒脈緊傷風脈緩

陰陽表裏辨

陽症之表發熱惡寒頭痛脊強便清不濁手足厥逆
陽症之裏唇焦舌燥煩渴掀衣揚手擲足大便秘
結小便赤澀爪甲紅活身輕易於轉側脈浮洪數

陰症之裏不渴踈臥引衣自蓋唇紫舌捲大便滑
泄小便清白爪甲青黑身重難以轉側脈沉細數
唯腹痛與嘔陰陽表裏皆有之三陽經又有陰陽
表裏之分太陽以熱在皮膚頭痛項強在經爲表
麻黃桂枝湯九味羌活湯以口渴尿赤熱入膀胱
在府爲裏五苓散陽明以熱在肌肉目痛不眠在
經爲表葛根解肌湯以口渴背寒爲熱漸入裏白

虎加參湯若自汗狂譫熱已入胃府爲全入裏調
胃承氣湯少陽以胸脇之間爲半表半裏表多小
柴胡湯裏多熱盛者黃芩湯以上皆發熱太陽惡
寒陽明自汗少陽多嘔皆三陽症也大抵陽症多
得之風寒暑濕邪生於太陽也陰症多得之飲食
起居七情邪生于少陰也故曰傷寒內傷者十居
八九也

傷寒主治四字論

傷寒主治四字者表裏寒熱也太陽陽明爲表太陰少陰厥陰爲裏少陽居表裏之間謂之半表半裏凡傷寒自陽經傳入者爲熱邪不由陽經傳入而直入陰經者謂之中寒則爲寒邪此皆前人要旨也而予則更於寒熱表裏四字舉八言以晰之任傷寒千變萬化總不出此夫傷寒症有表寒有裏寒又有表熱

裏熱有表裏皆熱有表裏皆寒有表寒裏熱有表熱
裏寒何謂表寒傷寒初客太陽頭痛發熱而惡寒者
名曰外感經所謂體若燔炭汗出而散者是也陽明
解肌少陽和解其理一也何謂裏寒凡傷寒不由陽
經傳入而直入陰經手足厥冷脈微細下利清穀者
名曰中寒仲景所謂急溫之宜四逆湯者是也何謂
表熱凡人冬不藏精微寒襲於肌膚之間醞釀成熱

至春感溫氣而發者爲溫病至夏感熱氣而發者爲
熱病其症頭痛發熱與正傷寒同但不惡寒而口渴
與正傷寒異耳傷寒賦云溫氣發于春夏務須柴葛
以解肌言病邪在表故用柴葛肌肉韞熱故用黃芩
知母以佐之此活法也何謂裏熱凡傷寒漸次傳裏
與夫春溫夏熱之症熱邪入裏皆爲裏熱其在太陰
則津液少少陰則咽乾口燥厥陰則消渴仲景所謂

急下之而用大柴胡三承氣者是也何謂表裏皆熱
如傷寒陽明症傳于本府外而肌肉內而胃府熱氣
薰蒸口渴譫語此散漫之熱邪未結聚治用白虎湯
外透肌膚內清藏府俾表裏兩解不比邪熱結實專
在陽胃可下而愈也正傷寒有此而溫熱之病更多
有此不可不察何謂表裏皆寒凡傷寒表受寒邪更
兼直中于裏此爲兩感寒症仲景用麻黃附子細辛

湯是也何謂表寒裏熱如兩感熱症一曰太陽與少
陰同病二曰陽明與太陰同病三曰少陽與厥陰同
病三陽爲寒三陰已成熱症豈非表寒而裏熱乎亦
有火鬱在內而加以外感亦爲表裏寒熱之候更有
火亢已極反兼水化內熱閉結而外有惡寒之狀者
其表似寒而裏實熱悞投熱劑下咽卽敗矣何謂表
熱裏寒如人本體虛寒而外感溫熱之邪此爲標熱

本寒清之不宜太過更有陰寒在下逼其無根失守之火發揚于上肌膚太熱欲坐臥泥水中者其表似熱其裏實寒悞投寒劑入胃卽危矣傷寒變症萬有不齊而總不外乎寒熱表裏四字其表裏寒熱變化莫測而總不出此八言以爲綱領予寢食于茲者三十年矣得之于心應之于手今特指出而發明之學者其可不盡心乎

寒熱虛實表裏陰陽辨

病有總要寒熱虛實表裏陰陽八字而已病情既不外此則辨症之法亦不出此一病之寒熱全在口渴與不渴渴而消水與不消水飲食喜熱與喜冷煩燥與厥逆溺之長短赤白便之溇結脈之遲數以分之假如口渴而能消水喜冷飲食煩燥溺短赤便結脈數此熱也假如口不渴或假渴而不能消水喜飲熱

湯手足厥冷溺清長便溏脈遲此寒也一症之虛實全在有汗與無汗腹胸脹痛與否脹之減與不減痛之拒按與喜按病之新久稟之厚薄脈之虛實以分之假如病中無汗腹脹無減痛而拒按病新得人稟厚脈實有力此實也假如病中多汗腹脹時減復如故痛而喜按按之則痛止病久稟弱脈虛無力此虛也一病之表裏全在發熱與潮熱惡寒與惡熱頭痛

與腹痛鼻塞與口燥舌胎之有無脈之浮沉以分之
假如發熱惡寒頭痛鼻塞舌上無胎脈息浮此表也
假如潮熱惡熱腹痛口燥舌胎黃黑脈息沉此裏也
至于病之陰陽統上六字而言所包者廣熱者爲陽
實者爲陽在表者爲陽寒者爲陰虛者爲陰在裏者
爲陰寒邪客表陽中之陰熱邪入裏陰中之陽寒邪
入裏陰中之陰熱邪達表陽中之陽而眞陰眞陽之

別則又不同假如脈數無力虛火時炎口燥唇焦內
熱便結氣逆上衝此真陰不足也假如脈大無力四
肢倦怠唇淡口和肌冷便溏飲食不化此真陽不足
也寒熱虛實表裏陰陽之別總不外此然病中有熱
症而喜熱飲者同氣相求也有寒症而喜冷飲卻不
能飲者假渴之象也有熱症而大便溏瀉者挾熱下
利也有寒症而大便反硬者名曰陰結也有熱症而

手足厥冷者所謂熱深厥亦深熱微厥亦微是也有
寒症而反煩燥欲坐臥泥水之中者名曰陰躁也有
有汗而爲實症者熱邪傳裏也有無汗而爲虛症者
津液不足也有惡寒而爲裏症者直中於寒也有惡
熱口渴而爲表症者溫熱之病自裏達表也此乃陰
陽變化之理爲治病之權衡尤辨之不可不早辨也

經府論